


**NA TEMELJIMA  
TRADICIJE  
GRADIMO  
BUDUĆNOST!**



**NEZAVISNA  
BOSANSKOHERCEGOVAČKA  
LISTA**

## Kandidat za načelnika Općine Stari Grad Sarajevo

# mr. Ibrahim HADŽIBAJRIĆ

**R**ođen je 1963. godine u Sarajevu. Diplomirao je 1988. godine na Poljoprivrednom fakultetu – Odsjek ratarstvo, također u Sarajevu, a magistarski rad na temu “Vladavina prava u savremenoj državi” uspješno je odbranio 2011. godine. Bila je to prvi put obrađena tema na prostorima bivše Jugoslavije. Subspecijalizaciju u oblasti zaštite i ispitivanja kvalitete pijaćih voda završio je 1990. godine u Novom Sadu. Prvo zaposlenje bilo je u Javnom komunalnom preduzeću „Vodovod i kanalizacija“, gdje je od 1988. do 1992. godine bio rukovodilac Sektora za održavanje zaštitnih zona. U toku rata od 1992. do 1995. godine bio je pripadnik Armije BiH. Od 1995. do 1997. godine radio je u Ministarstvu vanjskih poslova BiH kao šef i savjetnik Odsjeka za analitiku, informatiku i tehniku, gdje je saradivao s medijima, te povezivao južno-istočni prostor Balkana na ekonomsko-poslovnim principima. Funkciju vice konzula u Ambasadi Bosne i Hercegovine u Beču vršio je od 1998. do 2000. godine i bio angažovan na poslovima konzularne problematike, uspostavljanja poslovno-ekonomskih veza BiH i Republike Austrije. Od 2006. do 2008. godine obavljao je funkciju direktora Fonda memorijala – Fonda za zaštitu i održavanje globalja šehida i poginulih boraca, memorijalnih centara i spomen – obilježja žrtava genocida Kantona Sarajevo. Na lokalnim izborima održanim 2008. godine građani su mu poklonili povjerenje i izabrali ga za načelnika Općine Stari Grad Sarajevo. Nadmoćnu pobjedu u izboru za načelnika Općine Stari Grad odnio je još dva puta na lokalnim izborima i proglašen je načelnikom decenije u BiH.



**Nosilac liste za Općinsko  
vijeće Stari Grad Sarajevo**

**dr.sc. Mirza  
BATALOVIĆ, dipl.el.ing.**



**R**ođen je u Sarajevu 1982. godine. Diplomirao je na Elektrotehničkom fakultetu u Sarajevu 2007. godine, te stekao zvanje diplomirani inženjer elektrotehnike. Magistrirao je 2011. godine, a stepen doktora elektrotehničkih nauka stekao je 2016. godine na istoimenom fakultetu. Od 2007. godine zaposlen je na Elektrotehničkom fakultetu u Sarajevu kao asistent i tu funkciju obavljao je do 2011. godine kada je dobio zvanje višeg asistenta. Na navedenoj poziciji ostao je do 2016. godine kada je izabran u zvanje docenta na Odsjeku za elektroenergetiku, gdje je trenutno zaposlen. Također, bio je angažiran na Mašinskom fakultetu u Sarajevu i Internacionalnom Burch Univerzitetu. Od 2015. godine recenzent je u Naučnom časopisu "Tehnički vjesnik – Technical Gazette", indeksiranom u međunarodnim bazama. Autor je trinaest naučnih radova, te fakultetskih skripti za predavanja na Odsjeku za elektroenergetiku. U okviru vanakademske angažmana bio je na poziciji konsultanta u kompanijama Energoinvest d.d. Sarajevo i Deling d.o.o. Tuzla. Na projektu Pierce Atwood u USAID-u u periodu od 1999. do 2003. godine prevodio je s engleskog na bosanski jezik zvanične dokumente i radio kao simultani prevodilac. Tokom 2019. godine obavljao je dužnost predsjednika skuštine KJP za gospodarenje državnim šumama „Sarajevo-Šume“ d.o.o. Sarajevo. Aktualni je predsjednik Općinskog odbora NBL-a za Stari Grad i Generalni sekretar NBL-a. Dobitnik je plakete za izuzetan doprinos distribuciji OS Windows 7 i MS Office 2010. na bosanskoj ćirilici i latinici. Govori engleski i arapski jezik.





## 2 Dr. Lejla BEGOVIĆ

Rođena je u Sarajevu 1965. godine. Nakon završenog Medicinskog fakulteta položila je specijalistički ispit iz otorinolaringologije 2002. godine i stekla stepen magistar medicinskih nauka 2012. godine. U periodu od aprila 1990. do maja 1995. godine bila je zaposlena u Institutu zaštite na radu u Sarajevu kao stručni saradnik, a od maja 1995. godine do oktobra 1996. godine na Klinici za endokrinologiju i bolesti metabolizma u KCUS. Od oktobra 1996. godine radi kao specijalista otorinolaringolog u JU Opća bolnica „Prim. dr. Abdulah Nakaš“ u Sarajevu. Objavila je veliki broj radova i učesnik je više domaćih i međunarodnih kongresa. Govori engleski jezik.



## 3 mr. Seid ŠKALJIĆ

Rođen je 1987. godine u Sarajevu. Ekonomski fakultet u Sarajevu završava 2012. godine i stiče zvanje bachelor ekonomije, a potom 2019. godine stiče zvanje magistra menadžmenta i poslovne ekonomije na Fakultetu za menadžment i poslovnu ekonomiju-smjer poslovna psihologija. Poslovno iskustvo stekao je u privatnom sektoru, kada je 2008. godine osnovao privredno društvo koje uspješno vodi i danas. Aktivni je vijećnik Općinskog vijeća Stari Grad Sarajevo već drugi mandat za redom i pokrenuo je brojne prijedloge i inicijative u cilju boljeg razvoja lokalne zajednice. Zalaže se za privredni razvoj općine. Govori njemački i engleski jezik.



## 4 Husein HOLJAN

Rođen je 1986. godine u Sarajevu. Po završetku Srednje medicinske škole u Sarajevu 2005. godine stekao je zvanje sanitarno-ekološkog tehničara. Posjeduje certifikat o položenom stručnom ispitu za državnog namještenika. Zaposlen je kao sekretar Mjesne zajednice Širokača od 2011. godine, te se kroz ovaj angažman istakao aktivnim radom na terenu, planiranjem aktivnosti, radom sa socijalno ugroženim kategorijama društva, te svim aktivnostima usmjerenim u pravcu daljeg razvoja lokalne samouprave. Obavljao je i poslove javne higijene i održavanja javnih površina u okviru Službe za inspekcijske poslove Općine Stari Grad Sarajevo. Saradivao je s UNDP-om na projektu „Jačanje uloge mjesnih zajednica u BiH“.

## 5 Prof. dr. Emina KISELJAKOVIĆ

Rođena je u Sarajevu 1966. godine. Nakon završenog Medicinskog fakulteta, stekla je zvanje magistar medicinskih nauka 2004. godine. Stručno zvanje specijaliste Medicinske biohemije stekla je 2005. godine, a 2011. godine naučni stepen doktor medicinskih nauka. Od 1998. zaposlena je na Medicinskom fakultetu Univerziteta u Sarajevu. Član je Komisije Federalnog ministarstva zdravstva za polaganje specijalističkog ispita iz Medicinske biohemije. Učestvuje u radu Laboratorija za Molekularnu medicinu i profesor je na Doktorskom studiju „Biomedicina i zdravstvo“ na Medicinskom fakultetu Univerziteta u Sarajevu. Govori engleski i turski jezik.



## 6 Sejfo ŠEHOVIĆ

Sejfo Šehović rođen je 1959. godine u Sarajevu. Završio je Višu upravnu školu u Sarajevu 1984. godine i stekao zvanje pravnik za upravne poslove. Diplomom profesora sigurnosti stekao je na Fakultetu političkih nauka u Sarajevu. Trenutno je u penziji, nakon dugogodišnjeg uspješnog policijskog staža tokom kojeg je bio komandir i načelnik stanica policije u nekoliko gradskih općina i Kantonu Sarajevo u periodu 1994-1999. Aktualni je vijećnik u Općinskom vijeću Stari Grad Sarajevo. Uspješno se bavi sportom ponosno predstavljajući BiH i od 2015. godine je državni, balkanski, evropski i svjetski prvak u powerliftingu i benchpressu. Osim što je dizač tegova, Šehović je i delegat u Premijer ligi BiH u fudbalu, te komesar za takmičenje Kantonalne lige Fudbalskog saveza Kantona Sarajevo.



## 7 Dr. Nizama ŠUKUROVIĆ

Rođena je 1973. godine u Sarajevu. Završila je Medicinski fakultet u Sarajevu 2002. godine i stekla zvanje doktora medicine. Položila je specijalistički ispit iz neuropsihijatrije. Radi kao specijalista neuropsihijatar u Zavodu za bolesti ovisnosti Kantona Sarajevo. Trenutno je na doktorskom studiju na Medicinskom fakultetu „Biomedicina i zdravstvo“. Obavlja sve aktivnosti iz domena neuropsihijatrije, adiktologije i očuvanja mentalnog zdravlja. Tokom cijelog radnog staža aktivno učestvuje u radu multidisciplinarnog tima. Završila je edukaciju iz zdravstvenog menadžemnta SHCE. Iza nje je desetogodišnje aktivno učešće u folklornom ansamblu KUD „Željezničar“, a završila je i nižu muzičku školu, Odsjek balet.





## 8 Amrudin DŽANOVIĆ

Rođen je u Sarajevu 1971. godine. Završio je Srednju grafičku školu u Sarajevu, a profesionalno je angažovan u porodičnoj stolarskoj radionici 'Enterijeri Džanović' s dugogodišnjom tradicijom. Period od 1992-1995. godine proveo je kao pripadnik Armije RBiH u 102. Motorizovanoj brigadi, a pored sarajevskog, bio je raspoređen i na više drugih ratišta u BiH. Društveno je odgovoran i politički aktivan. Predsjednik je Savjeta Mjesne zajednice Mahmutovac, kao i Mjesnog odbora Nezavisne bosanskohercegovačke liste na Mahmutovcu. Svojim iskustvom i predanim radom želi doprinijeti boljem životu svih građana Općine Stari Grad Sarajevo.



## 9 mr. Sabina ŠEGALO

Rođena je 1977. godine u Sarajevu. Diplomirala je 2014. godine na Fakultetu zdravstvenih studija Univerziteta u Sarajevu i stekla zvanje diplomiranog inženjera medicinsko-laboratorijske dijagnostike. Titulu magistra mikrobiologije stiče 2016. godine na PMF-u. Za rezultate postignute tokom I i II ciklusa studija, Univerzitet u Sarajevu joj dodjeljuje priznanje Srebrna značka. Trenutno je doktorand na Fakultetu zdravstvenih studija Univerziteta u Sarajevu. Uposlenik je Medicinskog fakulteta Univerziteta u Sarajevu. Autor i koautor je 25 naučnih i stručnih radova. Govori engleski jezik.



## 10 Adnan TALIĆ

Rođen je u Sarajevu 1960. godine. Diplomirao je na Ekonomskom fakultetu Univerziteta u Sarajevu, Odsjek finansije. Djeluje kao samostalni obrtnik čuvajući porodičnu tradiciju obučarske radnje koju je započeo njegov otac 1939. godine. Aktualni je vijećnik u Općinskom vijeću Stari Grad Sarajevo, kao i vijećnik u Gradskom vijeću Grada Sarajeva. Predsjednik je komisije za Finansije i budžet pri Općinskom vijeću Stari Grad Sarajevo, kao i predsjednik Etičkog odbora pri Gradskom vijeću. Svoj politički angažman ostvaruje kroz aktivno učešće u radu Nezavisne bosanskohercegovačke liste (NBL), te kao predsjednik Kluba vijećnika NBL-a u Općinskom vijeću Stari Grad Sarajevo. Bio je aktivni učesnik pri osnivanju NBL- a, a prethodno i Prve nezavisne liste.



## 11 Adisa POTURA

Rođena je 1995. godine u Sarajevu. Završava Ekonomski fakultet u Sarajevu 2017. godine gdje stiče zvanje bachelor poslovanja. Trenutno je apsolvant drugog ciklusa studija na Ekonomskom fakultetu. Tokom studiranja radila je kao promoter mobilnog bankarstva, a 2017. godine obavlja studentsku praksu unutar UniCredit banke. Od 2018-2019. godine stručno osposobljavanje vrši u Općini Stari Grad pri službi za finansije i službi za investicije i komunalne poslove. Odlikuju je timski duh i dobre komunikacijske vještine. Govori engleski i njemački jezik.



## 12 Amar TRBOVIĆ


Rođen je u Sarajevu 1989. godine. Završio je Pravni fakultet u Kiseljaku – Univerzitet u Travniku nakon čega je upisao Master studij na Fakultetu političkih nauka u Sarajevu. Zaposlen je kao Operator za fakturisanje i naplatu u dioničkom društvu BH Telecom Sarajevo. Aktualni je vijećnik u Općinskom vijeću Stari Grad Sarajevo. Dugi niz godina predstavnik je mladih Sindikata BH Telecoma, te je jedan od predstavnika Sindikata mladih FBiH. Govori engleski jezik.



## 13 mr. Sabrina ŠATROVIĆ

Rođena u Sarajevu 1976. godine. Tokom rata radila je kao tehničar u zavodu za zaštitu žena i materinstva u Sarajevu. Diplomirala je poslovnu psihologiju i magistrirala menadžment na Ekonomskom fakultetu. Radila je dugi niz godina u avio kompaniji BiH, JP BH AIRLINES, te danas kao stručni saradnik u putničkoj agenciji Travelin. Posjeduje više certifikata, licenci i dozvola iz oblasti globalne avio industrije i avio saobraćaja stečenih u Londonu i Velikoj Britaniji (ATPCO, IATA...). Školovala se u Njemačkoj za globalni sistem računovodstva iz oblasti avio idustrije i transporta, obračuna letova, cijena, usluga te kontrola podataka i poslovne inteligencije. Govori engleski jezik.





## 14 Alija BEGIĆ

Rođen je u Sarajevu 1979. godine. Po završetku Srednje škole za saobraćaj i komunikacije Sarajeva 1997. godine stekao je zvanje saobraćajni tehničar. Trenutno je student treće godine Ekonomskog fakulteta. Samostalni je privrednik od navršene 18. godine života, te zapošljava 20 radnika. U periodu od 2009. do 2013. godine bio je vijećnik u Općinskom vijeću Stari Grad Sarajevo. Bavio se različitim sportovima i bio učesnik mnogih takmičenja.



## 15 mr. Amer HADŽIĆ

Rođen je 1987. godine u Sarajevu. Završio je Akademiju likovnih umjetnosti, odsjek grafika 2010. godine, nakon čega i postdiplomski studij koji je završio 2012. godine. Zaposlen je na Akademiji likovnih umjetnosti u Sarajevu, gdje je radio kao stručni saradnik u nastavi, a sada kao asistent na oblasti grafika i crtanje. Učestvovao je na velikom broju projekata i grafičkih radionica kao koordinator i voditelj u ime ALU Sarajevo. Više puta izlagao je samostalno, te učestvovao u mnogim međunarodnim izložbama, projektima, simpozijima i likovnim kolonijama. Od 2009. godine član je ULU HKD Napretka, a od 2011. godine član ULUBIH-a, dok je 2011. godine osnovao Udruženje za promociju kulture i umjetnosti „Arka“.



## 16 Mahira BRKIĆ

Rođena je 1980. godine u Sarajevu. Završila je Ekonomski fakultet u Sarajevu, smjer Razvoj poslovnih informacionih sistema i stekla zvanje bakalaureat poslovanja. Trenutno je zaposlena na Ekonomskom fakultetu u Sarajevu, kao referent za studentska pitanja. Krase je timski duh, dobra organizacija rada, planiranje radnih aktivnosti, spremnost za rad u timu, prilagođavanje novim sredinama, kreativnost, posvećenost radnim zadacima, sposobnost timskog rada. Aktivni je član Nezavisne bosanskohercegovačke liste i uvjerenja je da svojim aktivnim i direktnim učestvovanjem u procesu donošenja odluka kroz nadležne institucije može doprinijeti očuvanju i promovisanju kulturne vrijednosti grada Sarajeva, počevši od Starog Grada kao njegove historijske i kulturne jezgre.



## 17 Nermin IKOVIĆ

Rođen je u Sarajevu 1972. godine. Nakon srednje Elektrotehničke škole upisuje Fakultet kriminalističkih nauka gdje stiče zvanje diplomiranog kriminaliste. Zaposlen je i radi na poziciji direktora prodaje društva „Skuter“ d.o.o. Sarajevo. Cijeli period rata 1992-1995. proveo je kao pripadnik Armije RBiH. Na Vareškom ratištu 1994. godine ranjen je gdje ostaje RVI s 80% invaliditeta. Društveno je odgovoran i politički aktivan. Trenutno obavlja funkciju aktivnog vijećnika u Općinskom vijeću Stari Grad Sarajevo, za mandatni period 2016-2020. godine. Uz vrijedan, transparentan i pošten rad želi dati svoj doprinos u poboljšanju uvjeta života svih građana Općine Stari Grad.



## 18 Samra KOIS

Rođena je 1971. godine u Sarajevu. Završila je Petu gimnaziju u Sarajevu 1989. godine i stekla zvanje administrativni tehničar. Prvo radno iskustvo obnaša u Fabrici duhana Sarajevo u službi za računovodstvo, zatim 8 godina kao samostalni djelatnik. Godinu dana je obavljala poslove tehničkog sekretara u odjeljenju za privredni kriminal, a potom biva operativno-tehnički sekretar u Upravi za administraciju i podršku Ministarstva unutrašnjih poslova Kantona Sarajevo. Trenutno vrši dužnost višeg referenta za poslove izrade ličnih karata, prebivališta i boravišta, te JMB građana. Završila je poslovnu školu za savremene tajnice te položila stručni ispit za namještenike u organima državne službe u Federalnom ministarstvu pravde.



## 19 Edib LALIĆ

Rođen je 1954. godine u Sarajevu. Završio je srednju Tekstilnu-tehničku školu u Sarajevu 1973. godine. Prvo radno iskustvo stiče kao vanjski saradnik u Istiklal Istanbul zastupništvu za Sarajevo, a potom u firmi „Bem-Bau“ u Beču. Godine 1978. otvara privatnu aranžersko-dekorsku radnju „Lalić“ u Sarajevu. Kao budući vijećnik svoj rad bi zasnovao na pokretanju novih projekata u turističkoj ponudi Općine Stari Grad Sarajevo. Govori engleski i njemački jezik.





## 20 Berin AJANOVIĆ

Rođen je u Sarajevu 1973. godine. Završio je Srednju elektrotehničku i Srednju saobraćajnu školu u Sarajevu, a potom djelovao kao samostalni privrednik do 2013. godine, nakon čega je profesionalno angažovan u Ministarstvu privrede Kantona Sarajevo, gdje i danas radi. Bio je pripadnik Armije RBiH od 1992. godine aktivno braneći našu domovinu sve do završetka agresije 1995. godine. Aktivno se bavio sportom i kao član Judo kluba Bosna osvojio je nekoliko zlatnih i srebrnih medalja. Govori engleski jezik.



## 21 Dijana PARLA

Rođena je u Sarajevu 1979. godine. Po završetku Pravnog fakulteta Univerziteta u Sarajevu stekla je zvanje diplomiranog pravnika. Pripravnički staž i poslove stručnog saradnika za normativno pravne poslove stekla je u Vladi FBiH. Trenutno obavlja menadžerske poslove u privatnom sektoru i bavi se proizvodnjom slatkiša poznatim kao „Di Fondat corner“. Kroz aktivno učešće u projektu UNDP „Uloga jačanja lokalne zajednice“ stekla je certifikat za pisanje projekata i dio je tima koji je uspješno realizirao ideju prvog igrališta za djecu na Sedreniku. Potpredsjednica je Skupštine Vijeća roditelja Kantona Sarajevo u dva mandata. Aktivno je učestvovala na definiranju prijedloga Zakona o osnovnom i srednjem obrazovanju KS, Zakona o udžbenicima kao i većem broju podzakonskih akata koji rješavaju pitanja u interesu djece.



## 22 Haris REDŽEPAGIĆ

Rođen je 1962. godine u Prištini. Završio je srednju Elektrotehničku školu u Sarajevu 1979. godine, a potom vanredno upisuje višu PTT školu, smjer telekomunikacije. Od 1980-1987. godine radio je u računarskom centru Elektroprivrede BiH, a nakon toga u informatičkoj firmi „Iskra Delta“ do početka rata. Tokom rata bio je pripadnik jedinice avijacije gdje je radio na formiranju i osposobljavanju centra veze istoimene jedinice. Bio je vlasnik grafičkog studija „Studio 2000“ do 2015. godine. Trenutno se bavi kućnom radinošću i izradom suvenira. Veliki je ljubitelj sporta, a naročito skijanja i brdskog biciklizma.

23

## Amina ŠUMAN - BRKIĆ

Rođena je u Sarajevu 1991. godine. Nakon završene Muzičke akademije u Sarajevu 2015. godine, stekla je zvanje Bakalaureat muzičkih umjetnosti - solo pjevanje, profesor pjevanja, operna pjevačica. Godinu dana poslije položila je stručni ispit za samostalan odgojno obrazovni rad. Bavi se privatnim poslom i od 2016. godine vlasnica je ugostiteljskog objekta. Stekla je značajno iskustvo u pisanju i realizaciji projekata, strateškom planiranju, organizacija manifestacija i humanitarnih projekata. Bila je članica horova KUD „Seljo“ i „Pontanima“, te učestvovala u predstavama Otvorene scene Obala.



24

## Edin DURANOVIĆ

Rođen je u Sarajevu 1980. godine. Završio je Fakultet kriminalističkih nauka u Sarajevu i stekao zvanje diplomirani kriminalista. Radio je na poslovima sigurnosti u državnim i federalnim institucijama. Položio je državni ispit općeg znanja za državnog službenika, kao i stručni ispit FMUP-a. Stranci se priključio kako bi svojim aktivnostima, radom i trudom doprinio i bio dio tima koji najpredanije radi, kako za Općinu Stari Grad Sarajevo, tako i za bosanskohercegovačko društvo u cjelini. Govori engleski jezik.



25

## dr.sc. Mato DOMINKOVIĆ

Rođen je 1960. godine u Orašju. U Zagrebu završava Prometni fakultet gdje stiče zvanje inženjer prometa. Potom završava fakultet za uslužni menadžment u Doboju i stiče zvanje dipl.oec. i magistar teologije. Postaje doktor ekonomskih nauka 2020. godine. Obnašao je funkciju direktora u J&B Company d.o.o u Orašju, tehničkog direktora u Fortuna d.o.o u Rijeci, direktora predstavništva Hrvatske firme Bojorad u Landsutu kao i funkcije savjetnika i prevoditelja za Jugoistočnu Evropu na Institutu u Minhenu. Trenutno je direktor IPM-Istraživačkog Instituta za politiku mira. Iza sebe ima objavljena tri znanstvena rada iz ekonomije i osiguranja s međunarodnom recenzijom. Govori njemački jezik.





## 26 Naida ĐUGUM

Rođena je 1999. godine u Sarajevu. Završila je Petu gimnaziju u Sarajevu, a potom 2018. godine upisuje Fakultet političkih nauka. Trenutno je treća godina studija. Bavi se sportom i ima zvanje atletske sudije Udruženja atletske sudija Kantona Sarajevo, zatim odbojkaškog sudije

Odbojkaškog saveza FBiH i radi kao sportski trener Odbojkaškog kluba „Stari Grad“ Sarajevo. Govori engleski i turski jezik. Priključila se Nezavisnoj bosanskohercegovačkoj listi kako bi svojim trudom i radom dokazala mladima da se mogu ostvariti i u Bosni i Hercegovini, a timskim radom učinila sve za dobrobit cjelokupne zajednice.



## 27 Mahir HASANBEGOVIĆ

Rođen je 1979. godine u Sarajevu. Završio je Srednju elektrotehničku školu i stekao zvanje tehničar elektronike. Od 2009. godine zaposlen je u Lutriji BiH na poslovima servisiranja i održavanja računarske opreme. Uporedo se bavi i privatnim poslom u sektoru turizma i ugostiteljstva.

Nezavisnoj bosanskohercegovačkoj listi priključio se s ciljem da svojim angažmanom doprinese poboljšanju uvjeta života lokalne zajednice na području općine Stari Grad Sarajevo.



## 28 Elvedina MUHOTIĆ

Rođena je 1977. godine u Sarajevu. Srednju školu završava 1995. godine, te stiče zvanje kozmetičar. Prvo radno iskustvo stekla je 1996. godine u kozmetičkom studiju „Bisera“, a zatim u studiju „Mahir“. Prisustvovala je velikom broju seminara i obuka u Zagrebu, Mostaru i Sarajevu.

Trenutno je zaposlena u privatnom kozmetičkom salonu. Aktivni je član Nezavisne bosanskohercegovačke liste, s ciljem ostvarenja bolje atmosfere kada je u pitanju lokalna zajednica na području općine Stari Grad Sarajevo.

## 29 Muhamed SUĆESKA

Rođen je 1966. godine u Višegradu. Završio je Fakultet islamskih nauka u Sarajevu i stekao zvanje profesora islamskih nauka. Zaposlen je u Medžlisu Islamske zajednice. Bio je pripadnik Armije RBiH u odbrambeno-oslobodilačkom ratu u BiH od 1992-1996. godine.



## 30 Džemo KLAČAR

Rođen je 1961. godine u Sarajevu. Po zanimanju je geometar. Trenutno je u penziji. Aktivno se bavio sportom sve do 1998. godine, a od 2000. godine se bavi trenerskim poslom i posjeduje UEFA – A licencu, te vodi FK "Famos" Hrasnica. Bio je pripadnik Armije RBiH, a do kraja agresije na našu zemlju stekao je čin natporučnika.



## 31 Merjema ROVČANIN

Rođena je 1997. godine u Sarajevu. Završila je Fakultet Zdravstvenih studija u Sarajevu i stekla zvanje diplomiranog sanitarnog inženjera. Trenutno je na master studiju istog usmjerenja i završava pripravnički staž u Javnoj ustanovi Dom zdravlja Kantona Sarajevo. Tokom studija sticala je radnu praksu u više državnih institucija kao što su Federalni i Kantonalni Zavod za javno zdravstvo, KJKP "Vodovod i kanalizacija" Sarajevo, kao i u privatnim kompanijama. Odlikuje je spremnost na timski rad, dobra organizacija i planiranje poslova, ali i želja za dodatnom edukacijom i napredovanjem. Govori engleski jezik.






## 32 Fuad KUMRO

Rođen je u Sarajevu 1955. godine. Završio je Školu učenika u privredi i stekao zvanje zlatara. Prvo zaposlenje ostvaruje 1972. godine u zlatari „Zlatar-Sarajevo“, gdje je radio od 1972-2009. godine. Trenutno je u penziji. Bio je pripadnik Armije RBiH od 1992-1995. godine. Dugo godina se bavio sportom, bio je simpatizer i igrač fudbalskog kluba Vrbanjaša. Simpatizer je i aktivni član Nezavisne bosanskohercegovačke liste od njenog osnivanja, a ponajviše zbog zadovoljstva rukovodstvom i načinom organizacije lokalne samouprave u kojoj i sam živi. Dugogodišnje iskustvo, trud i zalaganje za bolje sutra će biti njegov motiv kao budućeg vijećnika.



## 33 mr.sc. Meliha ZULOVIĆ

Rođena je 1982. godine u Sarajevu. Diplomirala je na Fakultetu humanističkih nauka, Univerziteta Džemal Bijedić u Mostaru i stekla zvanje profesora engleskog jezika i književnosti. Zvanje magistra evropskih nauka stekla je 2010. godine na Univerzitetu u Sarajevu i Univerzitetu u Bolonji. Doktorant je za studij iz Evropske politike i međunarodnih odnosa univerziteta u Istanbulu. Zaposlena je kao profesor engleskog jezika u O.Š. "Edhem Mulabdić" Sarajevo. Dobitnica je državne stipendije Republike Turske za doktorski studij, kao i nekoliko nagrada za književnost i mlade pisce BiH. Govori engleski i turski jezik.



## 34 Emin ŠEHBAJRAKTAREVIĆ

Rođen je u Sarajevu 1992. godine. Završio je Prvu bošnjačku gimnaziju nakon čega je 2011. godine upisao Ekonomski fakultet u Sarajevu. Zaposlen je u realnom sektoru gdje uspješno obavlja poslove direktora firme SA-Capitals. Govori engleski jezik. Nezavisnoj bosanskohercegovačkoj listi se priključio s namjerom da prevashodno potakne i druge mlade ljude, ali i ostale građane da preuzmu odgovornost za stanje u lokalnoj zajednici.



## 35 Zoran BAGOJE

Rođen je 1967. godine u Sarajevu. Završio je srednju školu i po zanimanju je autoelektričar. Zaposlen je u Nitesco firmi i trenutno radi na mjerenu vodostaja rijeka. Bio je borac Armije RBiH od 1992-1996. godine i učesnik je svih borbi za odbranu grada i države BiH. Aktivni je učesnik Mjesnog odbora Mjedenica ispred Nezavisne bosanskohercegovačke liste čije postojanje podržava od osnivanja. Ponudiće svoje iskustvo i predanost u radu za dobrobit svih građana na području općine Stari Grad Sarajevo.



## 36 Vernesa BRDARIĆ

Rođena je 1985. godine u Trebinju. Završila je Fakultet političkih nauka u Sarajevu 2008. godine i stekla zvanje bachelor sociologije. Prvo radno iskustvo stiče 2010. godine u pravnoj službi Općine Stari Grad Sarajevo, a potom biva zaposlenik firme BH – Telecom u službi za ljudske resurse. Godine 2018. osniva žensku modnu konfekciju i uniforme za firme, škole i sportske klubove. Govori engleski jezik. Društvena je i odgovorna osoba spremna za nove izazove i iskušenja koja će doprinijeti boljim uvjetima života svih građana Starog Grada.



### VAŽNA PORUKA GRAĐANIMA:

#### Poštovani građani,

Na dan izbora Vi kao glasači imate izuzetno važnu ulogu, koja će svakako utjecati na dalje prilike i uvjete života u Vašoj lokalnoj zajednici. Aktualni načelnik, mr. Ibrahim Hadžibajrić dobivanjem priznanja načelnik decenije u BiH kao krune dosadašnjeg rada, nedvosmisleno je dokazao da u protekla tri navrata niste pogriješili pri svom izboru i hvala Vam na tome. Uvjereni smo da i ovaj put zajedno možemo stvoriti uvjete za pozitivne promjene i dobre projekte.

● Važno je znati da su uz općinskog načelnika vijećnici koje izaberete ti koji doprinose kvalitetnijem životu u ovoj lokalnoj zajednici i da je za pozitivne promjene i napredak neophodna većina u Općinskom vijeću. Stoga, nije dovoljno glasati za samo jednog kandidata s liste.

Ukoliko zaista želite da zajedničkim snagama ostvarimo naše najbolje namjere, poklonite i ovaj put povjerenje i svoj glas općinskom načelniku mr. Ibrahimu Hadžibajriću, Nezavisnoj bosanskohercegovačkoj listi (NBL) i SVIM kandidatima s liste NBL-a.

# NA TEMELJIMA TRADICIJE GRADIMO BUDUĆNOST!

Nastavit ćemo ulaganje u razvoj Starog Grada i njegovo identificiranje kao lokalnu zajednicu s kvalitetnim uvjetima življenja i pogodnim poslovnim okruženjem.

## PREDSTAVLJAMO PROGRAM 13/4

### 13 NAJVAŽNIJIH PROJEKATA ZA PERIOD 2020-2024.

#### **1.** IZGRADNJA PODZEMNE GARAŽE I VIŠENAMJENSKOG PLATOA SA SPOMEN-OBILJEŽJEM NA TRGU OSLOBOĐENJA - ALIJA IZETBEGOVIĆ

Na Trgu oslobođenja – Alija Izetbegović bit će izgrađena podzemna garaža s višenamjenskim trgom na kojem će biti spomen-obilježje poginulim borcima i spomen-obilježje poginulim borcima Prve brigade policije Stari Grad. Izgradnjom podzemne garaže riješit će se problem nedostatka parkinga, ali i urediti višenamjenski trg uz zadržavanje postojećih bista i spomen-obilježja i pejzažnih vrijednosti.

#### **2.** RJEŠAVANJE STATUSA BAZENA „BENTBAŠA“ IZGRADNjom SPORTSKO-REKREACIONOG CENTRA

Vrijeme je za rješavanje višegodišnjeg pitanja statusa Bazena „Bentbaša“ za koji smo i ranije predlagali nekoliko projekata koji, nažalost, nisu naišli na razumijevanje i podršku, kako Općinskog vijeća, tako ni viših organa vlasti. Na mjestu Bazena „Bentbaša“ želimo sagraditi moderni Sportsko-rekreativni centar i omogućiti građanima na jednom mjestu, u neposrednoj blizini gradske jezgre bavljenje sportom, odmor, rekreaciju, kupovinu i druge aktivnosti.

### **3. IZGRADNJA SPORTSKOG STADIONA NA DARIVI**

Uložit će se naponi za realizaciju ideje izgradnje fudbalskog igrališta na Darivi, kao dijelu grada koji se koristi kao rekreativna zona, za šetnju i odmor građana. Idejni projekat izgradnje fudbalskog igrališta sa svim pratećim sadržajima na lokalitetu Dariva predviđa: fudbalski teren, teren za zagrijavanje, zatvoreni teren za treninge, tribine, prateće sadržaje, parking, restoran-baštu i drugo. Idejni projekat fudbalskog igrališta s pratećim sadržajima bit će upućen nadležnim institucijama na odobravanje gradnje, u prvom redu Ministarstvu prostornog uređenja, građenja i zaštite okoliša Kantona Sarajevo i Kantonalnom Zavodu za zaštitu kulturno-historijskih objekata. Ukoliko bude dozvoljena gradnja ovog fudbalskog igrališta, on će umnogome doprinijeti oživljavanju ovog dijela grada, ali i osiguravanju kvalitetne infrastrukture i uvjeta za bavljenje sportom.

### **4. POTPUNA ADAPTACIJA I PONOVO PUŠTANJE U RAD VRTIĆA „BULBUL“**

Na proljeće, 2021. godine završit ćemo i pustiti u rad Vrtić „Bulbul“ na Bistriku. Rekonstrukcija i puštanje u rad ovog javnog vrtića u ulici Hulusina značit će mnogo za građane, posebno imajući u vidu nedostatak kapaciteta s kojim se odavno suočava Javna ustanova „Djeca Sarajeva“, kao i zbog činjenice da će to biti prvi javni vrtić u našoj općini na lijevoj obali Miljacke, od završetka agresije na naš grad.

### **5. PODRŠKA SAMOZAPOŠLJAVANJU MLADIH KROZ SUFINANSIRANJE INDIVIDUALNIH POKRETANJA BIZNISA**

Aktivnim zalaganjem općinskog načelnika mr.sc. Ibrahima Hadžibajrića i vijećnika NBL-a u Općinskom vijeću Stari Grad osigurat ćemo viša finansijska sredstva za pomoć mladim ljudima koji žele pokrenuti vlastite biznise u Starom Gradu. Dužnost nam je osigurati mladima perspektivnu budućnost i pomoći im u ostvarivanju njihovih poslovnih ideja, jer samo tako možemo zaustaviti odlazak mladih ljudi iz naše zemlje.

### **6. PODSTICAJ RAZVOJU POLJOPRIVREDE KROZ NABAVKU I DONACIJU MEHANIZACIJE ZA OBRADU ZEMLJE**

Općinu Stari Grad najčešće posmatraju kroz urbani dio i uže gradsko jezgro i mnogi ne vide njene potencijale izvan toga, a činjenica je da je oko 70% površine ove općine u padinskim dijelovima, pogodnim za bavljenje poljoprivredom i stočarstvom. Više od 450.000 KM uložili smo u prethodnih dvanaest godina za podsticaj bavljenja plasteničkom proizvodnjom, a rezultati na terenu su vidljivi. Na terenu, u razgovoru s građanima, uvidjeli smo njihove potrebe. Sve je više onih koji se žele baviti obradom zemlje i živjeti od plodova svog rada. Takvim ljudima osigurat ćemo neophodnu mehanizaciju za obradu zemlje i pomoći im u ostvarivanju njihovih ideja.

## **7.** SMANJENJE OBUHVATA ZAŠTIĆENOG PEJZAŽA BENTBAŠA

Pokrenut će se aktivnosti na smanjenju obuhvata zaštićenog pejzaža Bentbaša koji graniči sa susjednim entitetom kako bi se taj dio općine Stari Grad mogao privesti krajnjoj urbanističkoj namjeni. Ove aktivnosti neophodno je provesti kako bismo postigli da prostor Bentbaše bude obogaćen novim sadržajima i nastavimo njegov razvoj u smjeru najprepoznatljivije lokacije za odmor i rekreaciju građana.

## **8.** UKIDANJE VODOZAŠTITNE ZONE NA LOKALITETU MZ MOŠĆANICA

Već su pokrenute aktivnosti na izradi Elaborata ukidanja vodozaštitne zone na lokalitetu MZ Mošćanica kojim bi se stvorili preduvjeti za legalizaciju desetina objekata naših građana sagrađenih u donjem vodotoku Mošćanice, kao i dodatnu urbanizaciju ovog prostora. Od nadležnih nivoa vlasti tražit će se usvajanje ovog Elaborata kako bi se što prije stekli uvjeti za realizaciju ove ideje na terenu i rješavanje višegodišnjeg problema naših građana.

## **9.** REKONSTRUKCIJA I ASFALTIRANJE APELOVOG PUTA

Rekonstrukcijom i asfaltiranjem Apelovog puta, najkraće rute iz Sarajeva do Trebevića, prvi put poslije agresije na naš grad uspostaviti ćemo direktnu putnu komunikaciju između Sarajeva i Trebevića bez korištenja putne infrastrukture manjeg entiteta. Izvršiti će se sanacija i asfaltiranje putne komunikacije od Vakufskog imanja na Pogledinama do posljednje stanice bob staze na Trebeviću.

## **10.** OBNOVA I STAVLJANJE U FUNKCIJU TREBEVIĆKOG OPSERVATORIJA

Na uzvišenju na Trebeviću, znanom kao Čolina kapa, austro-ugarska vlast podigla je vojno utvrđenje Bistrik kulu. Kula je nakon Drugog svjetskog rata izgubila svoj vojni značaj, pa je 60-tih godina prošlog stoljeća predana na korištenje Astronomskom društvu „Orion“ koje je na tom mjestu formiralo jedini astronomski opservatorij u BiH. Nažalost, tokom agresije na naš grad Opservatorij je pretrpio teška oštećenja i do danas nije obnovljen. Uložiti ćemo maksimalne napore da ovaj simbol Trebevića i Sarajeva vratimo u funkciju, a Starom Gradu ponovo damo epitet jedine općine koja ima opservatorij.

## **11.** RASTEREĆENJE PUTNIH KOMUNIKACIJA U NASELJIMA

Općinski načelnik mr.sc.Ibrahim Hadžibajrić i vijećnici NBL-a u Općinskom vijeću Stari Grad zalagat će se za osiguravanje budžetskih sredstava za otkup objekata u privatnom vlasništvu, a s ciljem njihovog rušenja radi proširenja putnih komunikacija. Samo na ovaj način mogu se riješiti tzv 'uska grla' u određenim dijelovima Starog Grada i osigurati uvjeti za sigurno i neometano odvijanje saobraćaja.

## **12.** MAKSIMALNI ANGAŽMAN NA IZGRADNJI OBJEKATA UNUTAR CRVENE ZONE (BAŠČARŠIJA)

Baščaršija je naše najveće kulturno-historijsko blago. Kao lokalna zajednica nemamo nadležnosti nad restauracijom i rekonstrukcijom starih i ruševnih objekata, kao ni nad izgradnjom novih. Borit ćemo se za promjenu zakonske regulative i izmjenu obuhvata čime bismo vratili svoje nadležnosti i doprinijeli napretku najuže gradske jezgre.

## **13.** IZGRADNJA SIMBOLA ODBRANE GRADA SARAJEVA NA LOKALITETU ČOLINA KAPA (iznad Pandurevića kuća)

U noći s 4. na 5. april 1992. godine započela je opsada grada Sarajeva, jedna od najdužih opsada u modernoj historiji ratovanja, a koja je trajala sve do 29. februara 1996. godine. Sarajevo je 1.425 dana bilo pod opsadom, a tokom ove četiri godine ubijene su 13.952 osobe. U odbrani Sarajeva poginulo je ukupno 8.388 Sarajlija, pripadnika Armije Republike Bosne i Hercegovine. Na teritoriji deset gradskih općina ukupno je ubijeno 5.564 civila. U čast svih šehida i poginulih boraca, kao i civilnih žrtava rata u periodu od 1992-1995. godine želimo sagraditi Simbol odbrane Grada Sarajeva na lokalitetu Čolina kapa, iznad Pandurevića kuća kao vječiti podsjetnik i opomenu na ono što je ovaj Grad - heroj preživio.

## KAKO ISPRAVNO GLASATI ZA NAČELNIKA OPĆINE STARI GRAD?

Na manjem glasačkom listu su ispisana imena kandidata za načelnike općine. Potrebno je zaokružiti SAMO jedno ime, kao što je dole navedeno:

- IBRAHIM HADŽIBAJRIĆ**
- Drugi kandidat za načelnika
- Treći kandidat za načelnika

## KAKO ISPRAVNO GLASATI ZA KANDIDATE ZA OPĆINSKO VIJEĆE STARI GRAD SARAJEVO?

Na većem glasačkom listiću pronađite Nezavisnu bosanskohercegovačku listu - NBL, zaokružite stranku i SVE кандидате на листи NBL-a, као што је доле наведено:

- Nezavisna bosanskohercegovačka lista - NBL**
- Kandidat br 1**
- Kandidat br 2**
- Kandidat br 3**
- ...
- ...
- Kandidat br 36**